

VEDTEKTER I DEI KOMMUNALE SKULEFRITIDSORDNINGANE I SVEIO KOMMUNE.

Vedtak i Sveio kommunestyre 11.12.2017

Gjeldande frå 01.01.2018

1. FØREMÅL

Skulefritidsordninga er eit omsorgs- og fritidstilbod før og etter skuletid for 1.-4. årstrinn, og for barn med særskilte behov på 1.-7. årstrinn. Skulefritidsordninga skal leggje til rette for leik, kultur- og fritidsaktivitetar med utgangspunkt i alder, funksjonsnivå og interesser hos barna og ha fokus på fellesskap, likeverd, tryggleik og sjølvstende. Skulefritidsordninga skal gi barna omsorg og tilsyn. Barn med nedsett funksjonsevne skal givast gode utviklingsvilkår. Areal, både ute og inne, skal vere eigna for formålet.

2. EIGARFORHOLD

Sveio kommune er eigar og ansvarleg for drifta ved dei kommunale skulefritidsordningane. Kommunen kan nytte andre til å oppfylle plikta til å ha eit tilbod om skulefritidsordning, dersom dei elles oppfyller vilkåra i opplæringslova § 13-7. Kommunen skal etter lova føre tilsyn med private skulefritidsordningar.

3. OPPTAKSMYNDE

Søknad om opptak til SFO skal gjerast elektronisk (Visma skule). Skulen kan kontaktast og vil gi hjelp til å søkja. Rektor har ansvar for opptak og må sjå til at inntektsgrunnet sikrar eit SFO-budsjett i balanse, og dette set krav til tal påmeldte barn for at tilbodet kan oppretthaldast. Hovudutval for oppvekst/kultur er klageinstans. Klagefrist er tre veker frå det tidspunkt søkjaren får vedtaket. Søknadsfrist er 15.mars.

4. OPPTAKSKRITERIUM

Så langt råd er, skal alle som søker få plass. Dersom det er fleire søkjarar enn det er plass til, skal opptaket prioriterast etter følgjande retningslinjer:

- Barn med spesielle behov skal prioriterast framfor andre barn. Føresetnaden er at ei fagleg vurdering ligg til grunn. Barn med funksjonshemming kan delta t.o.m. 7.trinn.
- Yngre barn skal prioriterast framfor eldre barn.

5. OPPTAKSPERIODE OG OPPSEIING AV PLASSEN

Opptaket skal gjennomførast i vårsemesteret og gjeld til barnet er ferdig med 4.trinn om ikkje føresette seier opp plassen tidlegare. Det kan søkjast om plass etter fristen og gjennom heile skuleåret, men tildeling av plass blir berre aktuelt om det er forsvarleg kapasitet.

Det er ei gjensidig oppseiingstid på to -2- månadar, rekna frå den 1. i kvar måned. Oppseiinga må vere registrert innan 31. mai dersom barnet ikkje skal bruke SFO-plassen komande skuleår. Føresette må senda skriftleg oppseiing til den skulen skulefritidsordninga høyrer til.

6. FORELDREBETALING

Utgiftene til den ordinære skulefritidsordninga skal dekkast av foreldrebetalinga. Sveio kommunestyre gjer vedtak om pris for dei ulike tilboda kvart budsjettår.

For barn med særskilte behov er SFO gratis på 5.-7.trinn, men det skal betalast for elevar på 1.-4.trinn ut frå prinsippet om likebehandling.

Prisane blir vurdert regulert i tilknytning til den årlege budsjettprosessen. Ved prisendring som har si årsak i endringar i statlege føringar med konsekvensar for SFO, vil dette gjerast gjeldande frå den dato som staten har sett.

- For SFO i skuleåret skal det betalast 10 gonger pr. skuleår.
- For ferietilbod skal det betalast ekstra.
- Det er høve til å ta ekstra betaling til mat, turar og utflukter.
- For sein betaling vil føra til morarente.
- For henting av barn etter stengetid skal det betalast gebyr.

7. LEIKE-OG OPPHALDSAREAL

Skulefritidsordninga brukar skulen sine lokale og uteareal. Arealet skal ha godkjenning etter «Forskrift om miljøretta helsevern i barnehage og skole». Leike – og opphaldsareala skal fungera for leik, kultur – og fritidsaktivitetar med utgangspunkt i alder, funksjonsnivå og interesse hjå barna.

8. DAGLEG OPPHALDSTID OG ÅRLEG OPNINGSTID

Skulefritidsordninga følgjer skuleåret. Dagleg opningstid er normalt mellom kl.07.00 og kl.16.30 og tilbodsstrukturen har følgjande alternativ om det er nok påmeldte barn:

Full tid i skuleåret (morgon og ettermiddag)
Ettermiddagstilbod i skuleåret
Halv veke: måndag, tysdag og torsdag i skuleåret (morgon og ettermiddag)
Halv veke: onsdag og fredag i skuleåret (morgon og ettermiddag)

Tilbod i feriane

Tilbod i feriar kjem i tillegg til skuleårstilbodet, og føresette kan velja i ei veke før og ei veke etter skulestart, ei veke samanfallande med haustferien og ei veke samanfallande med vinterferien. Ein skule kan berre gi ferietilbod om det er 10-11 påmeldte barn. Når det er få barn det blir søkt om SFO for i feriane, kan det bli aktuelt å gi eit samla tilbod for barna på ein av skulane i kommunen. Opningstid i ferien er i tida kl.7.30 -16.00

9. BEMANNING OG LEING/KOORDINERING

Rektor er pedagogisk og administrativ leiar for skulefritidsordninga. SFO skal ha eige budsjett. Innan dei rammene som brukarbetalinga gir, kan rektor setja av tid til ein koordinator/leiar i ordninga.

Rettleiande bemanningsfaktor er 15 barn pr. vaksen, og det kan ikkje tilsetjast fleire vaksne enn betalingsgrunnlaget tilseier. Alle som blir tilsette i SFO, må leggja fram politiattest.

Koordinator/leiar for SFO deltek på samarbeidsmøte ved skulen i saker som gjeld ordninga primært, og i saker som gjeld annan drift av skulen, dersom desse grip inn i SFO.

Samarbeidsutvalet ved skulen er styre for skulefritidsordninga. Utvalet bør utvidast med ein representant for dei tilsette i skulefritidsordninga i saker der det er ønskjeleg.